

RICHARDS, THOMAS (1878 - 1962), llyfrgellydd a hanesydd

Enw: Thomas Richards
Dyddiad geni: 1878
Dyddiad marw: 1962
Priod: Mary Richards (née Roberts)
Rhiant: Jane Richards (née Mason)
Rhiant: Isaac Richards
Rhyw: Gwryw
Galwedigaeth: llyfrgellydd a hanesydd
Maes gweithgaredd: Hanes a Diwylliant; Llenyddiaeth ac Ysgrifennu
Awdur: Gwilym Beynon Owen

Ganwyd 15 Mawrth 1878 yn nhyddyn Maes-glas, ger Tal-y-bont, Ceredigion, yn fab i Isaac a Jane (ganwyd Mason) Richards. Symudodd y teulu wedyn i Ynystudur, ger Tre'rddôl. Cafodd ei addysg gynnar yn ysgolion Tal-y-bont a Thaliesin. Bu'n ddisgybl-athro am bedair blynedd ac yna, yn 1897, aeth yn athro i Ysgol Alexandra, Aberystwyth, am ddwy flynedd. Bu'n fyfyrwr yng Ngholeg Prifysgol Gogledd Cymru, Bangor (1899-1903) lle y graddiodd gydag anrhydedd mewn hanes dan [Syr John Edward Lloyd](#). Bu'n athro ysgol yn Nhywyn (1903-5), Bootle (1905-11), a Maesteg (1912-26).

Ar anogaeth [Thomas Shankland](#) ymgymerodd ag ymchwil i hanes Piwritaniaeth yng Nghymru yn Llyfrgell Palas Lambeth, yr Amgueddfa Brydeinig, Swyddfa'r Cofrestrau Cyhoeddus, a Llyfrgell Bodley. Ffrwyth yr ymchwil oedd nifer o lyfrau swmpus, *A history of the Puritan Movement in Wales, 1639-53* (1920), *Religious developments in Wales, 1654-62* (1923), *Wales under the Penal Code, 1662-87* (1925), a *Wales under the Indulgence, 1672-5* (1928). Fel canlyniad i'r gwaith ymchwil hwn cafodd ei gydnabod yr awdurdod pennaf ar ddechreuadau Ymneilltuaeth yng Nghymru. Enillodd radd M.A. Prifysgol Cymru yn 1914 a D.Litt. yn 1924.

Yn 1926 dychwelodd i Fangor i fod yn llyfrgellydd ei hen goleg. Parhaodd â'r gwaith a ddechreuwyd gan [Shankland](#) o gasglu llyfrau a chylchgronau Cymraeg, ac ymroes i'w dosbarthu a'u catalogio. Yna dechreuodd ar faes newydd, sef cywain i'r llyfrgell lawysgrifau ystadau gogledd Cymru a llunio iddynt gatalogau cynhwysfawr a hynod ddarllenadwy. Trwy lafur enfawr [Thomas Shankland](#) a Thomas Richards daeth llyfrgell coleg Bangor yn ganolfan ymchwil o'r radd flaenaf i hanes Cymru.

Meddai Thomas Richards y ddawn o sylwi ar hynodion pobl a gweld digrifwch sefyllfa. Yr oedd yn storiwr heb ei ail ac yn ddarlithydd a darlledwr poblogaidd. Cyhoeddodd amryw o lyfrau ar wahân i'r rhai a enwyd a chyfrannodd ysgrifau i eraill (cafwyd 77 ysgrif o'i eiddo yn *Y Bywgraffiadur Cymreig*). Ysgrifennodd lu o erthyglau i gyfnodolion ar hanes eglwysi ac unigolion, chwaraeon a phynciau eraill. Yr oedd yn ddiakon ym Mhenuel (B), Bangor, ac anrhydeddwyd ef â chadair Undeb Bedyddwyr Cymru yn 1957. Derbyniodd Fathodyn Anrhydeddus Gymdeithas y Cymmrodorion yn 1958 a gradd LL.D. er anrhydedd gan Brifysgol Cymru yn 1959. Priododd Mary Roberts o Nantlle yn 1912; bu iddynt ddwy ferch. Bu farw 24 Mehefin 1962 a chladdwyd ef ym Mynwent Dinas Bangor.

Awdur

Gwilym Beynon Owen

Ffynonellau

Thomas Richards, *Atgofion Cardi* (Aberystwyth 1960)

Rhagor o atgofion Cardi (Aberystwyth 1963) (sy'n cynnwys llyfryddiaeth gan Derwyn Jones)

Derwyn Jones a Gwilym B. Owen (goln.), *Rhwng y silffoedd ysgrifau gan Dr. Thomas Richards* (Dinbych 1978)

Y Cymro, 28 Mehefin 1962

North Wales Chronicle, 29 Mehefin 1962

Barn, Tachwedd 1962

Seren Cymru, 6 Gorffennaf 1962

Seren Gomer, haf 1978

Trafodion Cymdeithas Hanes Bedyddwyr Cymru, 1979

Y Genhinen rhif 29/2, 1979

Darllen Pellach

Geraint H. Jenkins, *'Doc Tom' Thomas Richards* (Caerdydd 1999)

Erthygl Wikipedia: [Thomas Richards](#)

Dolenni Ychwanegol

VIAF: [38639387](#)

Wikidata: [Q7793516](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

